

Kapiya Sën Paulus Kevu Muginsën Vu Kerisi-yi-alam Vu Timoti

¹ Sa Paulus sën Yesu Kerisi yi sinarë sa. Anutu sën ko hil yom vu yi lo luho Kerisi Yesu sën hil navo kwad in lo, yö denër bë sa gevong huk sagi.

² Lob sa kevu kapiya sënë yök vu hong Timoti sën sa nehalë hong bë sa nalug anon hong in ayom neya timu vu Kerisi lo. Hil Amad Anutu luho hil Mehöböp Kerisi Yesu degevong semusemu vu hong los kwaj gevongin hong, gedegevong bayom gëp revuh.

Hil Dahun Gagek Kuungsën Na

³ Wirek sa hevongin bë sena Masedonia jak, lob senër vu hong, rëk sa bë nanër gökin nah vu hong nabë: Gemedo Epesus in genanërin alam vahi saga nabë su desarömin gagek kuungsën dok na medetahu alam dok. ⁴ Log genanër vu sir nabë degevuü keruing los gagek sën denetatekin degwaj lo na, in gagek nebë sagi nevong mekwaj kwaj. Gaş su nelok vu sir bayoj neya timu vu Anutu rë. ⁵ Sa hevong horek sënë yök vu hong rak degwa timu sënë: Sa hevongin bë desepa dok bayoj niröp jak gekwaj verök jak bayoj na timu vu Yesu, lob mëm demedo los ahëj geving sir. ⁶ Yönon, in alam vahi devuu aggata niröp sënë ya, geya deneketul lok in gagek meris medenesap sir in jeggin jeggin. ⁷ Alam sënë denekuung bë detu alam horek degwa. Rëk su denerak yö hir gagek

sən denevngwəng rax lo degwa ni rē, log sir dugin gagek sənē degwa ving.

⁸ Nabē hil galē Anutu yi horek niröp nabē neggēp in bē tato aggata niröp vu hil, og hil rēk ajak ni nabē ngaa nivesa. ⁹ Yönon, hil arax ni bē horek og su yam in bē nanërin alam sən niröp rax lo rē, gax yam in bē nanërin alam sən denekeyēh horek lo, los alam sən denevong ngaa jeggin jeggin los nengaj dahis lo. Geyam in bē nanërin alam sən deneruu demij vu Anutu lo, los alam nij paya, gesir sən denevasap Anutu yi ngaa vabuong lo, gesir sən denesepa lox ngaa dob yi mu lo; geyam in bē nanërin alam sən denesis amaj los ataj medenediik lo, los alam sən denesis mehönnon vahi medenediik lo ving. ¹⁰ Geyam in bē nanërin maluh los avēh sən denevong baggēb lo los denevong paya vu maluh ngwē lo. Geyam in bē nanërin alam sən deneggodek alam in bē degeko monē jak sir lo, los alam gagek tetuhin sən, galam sən denelah gagek vun lo. Yönon, horek yam in bē nanërin ngaa nebē sənē los ngaa nipaya vahi pin sən nevong paya vu gagek anon lo. ¹¹ Gagek anon sənē neggēp lox Bengö Nivesa sən Anutu vo vu sa in bē sa nanër rangah lo, log Bengö Nivesa sagi netatekin Anutu arē böp los niwëek vu hil bē semusën ala yi.

Paulus Ahë Nivesa Vu Anutu In Kwa Pesivin Yi

¹² Hil Mehöböp Kerisi Yesu vo niwëek vu sa, gekwa nevo sa bē seyoh vu bē sa gevong yi huk, lob vong huk sənē lox ya sa nemağ, lom sa ahëğ nivesa vu yi. ¹³ Yönon, wirek og senër pelē rax yi, log sa nehevong begö vu yi alam rot gesa nehako

sa rak vu yi pangsën. Sa nehevong nebë saga in sa su rak degwa ni rë, gesa su hevong ving yi rë, rëk ma gekwa pesivin sa. ¹⁴ Lob Mehöböp vong semusemu ngahisekë rot vu sa, bemëm sayog neya timu vu Yesu Kerisi, besahëg ving yi pangsën. ¹⁵ Gagek sënëk yönon rot, beyoh vu bë alam pin degengo medegevong geving nabë Kerisi Yesu luk yam dob in bë geko hil alam nid paya nom vu yi. Lob sa mehö nig paya verok yi rot kesuu alam nij paya vahi pin. ¹⁶ Rëk mu Kerisi Yesu kwa vongin sa mugin betato rangah rak sa bë nejom yi ahon rot. Lob alam vahi pin sën rëk ayoj na timu vu yi lo degelë jak sa bedejak ni nabë rëk kwa gevongin sir nabë saga geving, bedemedo malaj-tumsën degwata. ¹⁷ Om hil gaço mehö-los-bengö sën nedo degwata los degwata lo arë jak. Arë böpata los niwëek gëp rangah beyö gëp degwata los degwata, in mehö sënë og su nedik rë, gehil su ayoh vu bë galë yi rë, log yik yi perurek timu saga sën Anutu sogek.

*Timoti Bare Niwëek Begedu Alam Sën Denesis
Begö Vu Anutu Lo*

¹⁸ Nalug Timoti-e! Sebo horek sënë vu hong nabë: Kwam bo gagek sën alam-denenër-gagek-rangahsën denër rak hong wirek lo. Gebasu gagek sagi dok na ayom, lok mëm pasang gwevong begö megebare niwëek nabë mehö-begö-yi nivesa ti. ¹⁹ Lob gwevong geving niwëek megebare, gegemedo los ayom niröp. In alam vahi su dene-sepa lok ngaa nivesa in bë ayoj niröp jak rë, om sën deneyoh paya medevasap sir nebë sën yag ya

mesis yi rak saap. ²⁰ Yik Humenaius luho Aleksander devong nebë sënë, lob sa hevong luho loḵ yah Satan nema in bë luho degeḵo vanë medejak ni, in luho su denanër pelësën jak Anutu arë nah gökin.

2

Hil Najom Jak Nabë Sënë

¹ Sa bë nanër niwëëḵ vu hong nabë ham gw-evong ngaa sënë natu muginsën: Ham najom jak in alam pin. Ham kwetag vu Anutu nabë doḵ vu sir bebo niwëëḵ vu sir medebare, log ham najom jak los kwamin vesa vu yi in sir. ² Log su kwam birek in alam-los-bengöj galam pin sën denetu ala medenegin hil lo. Gaḵ genajom jak in sir noh vu buk in mëm hil sepa doḵ Anutu megako arë jak niröp, log hil medo nivesa gengaa maggin su dahun hil. ³ Jomraksën nabë sënë og mëm yoh vu, bAnutu sën ḵo hil yom lo rëḵ kwa vesa in. ⁴ Neḵo hil yom vu yi, genevong in bë geḵo alam pin nom geving, bemëm dejak gageḵ anon degwa ni. ⁵ In hil arak ni bë Anutu yö timu nedo, log Mehö mamer-yi timu nare loḵ Anutu los mehönon vuheng atov. Yik yi Kerisi Yesu, geyi mehönon. ⁶ Lob töḵ yam rangah loḵ yi buk niröp sën Anutu yö ggooin rak menër lo, bediik loḵ yah alam pin bej in bago sir nom. ⁷ Log Anutu ggooin sa rak bë sa natu sinarë begevong yi huk menanër yi gageḵ sënë rangah. Sagi og sa su nehekuung rak rë, gaḵ sa nanër yönon. Geggooin sa rak, menevong sa ya vu alam-yu-ngwë in bë sa tateḵin gageḵ vu sir bayoj na timu vu yi medejak gageḵ anon ni. ⁸ Nebë

sënë, om sa hevongin bë alam denajom jak noh vu nyëg pin. Rëk mu degevu gagek petupeksën los ahë sengënsën na gedepesu nemaj in ngaa nipaya loḱ mëm debarah nemaj jak medenajom jak na vu Anutu.

Gagek Rak Avëh

⁹ Log sa hevongin ving bë: Avëh dedahun sir be-dejöp röpröp lu ngaa nivesa sën yik yoh vu bë avëh dejöp lo. Gaḱ su degeḱo sir jak medebii yuj los debunëḱ vu navij jak kumḱum goor lu vunëksën malangeri aggagga, los röpröp sën yi monë böpata lo. ¹⁰ Gaḱ degevong huk nivesa aggagga noh vu sën Anutu yi hur avëh lo degevong lo, og mëm sënë natu hir vunëksën anon rot. ¹¹ Avëh dedahun sir bayej nama gedegengö gagek medejak ni nivesa. ¹² Sa hevongin bë avëh ti su natu tatovaha ma ggev vu maluh rë, gaḱ sir avëh og avij gemir gemedo denapöö jak gagek mu. ¹³ In degwa nebë Anutu semu Adam mugin loḱ mëm semu Eva tamusën. ¹⁴ Lob Adam su bë nenga vu gagek kuungsën rë, gaḱ avëh mu yö keyëh mebë nenga vu gagek. ¹⁵ Rëk mu avëh hir huk bë degeḱo naluj, om yik degevong nabë saga, gayoj na timu vu Yesu geving bahëj nivesa vu mehönon medesepa doḱ aggata niröp los degegin sir nivesa, og Anutu rëḱ geḱo sir nah vu yi.

3

Gagek Rak Ggev Sën Denegin Kerisi-yi-alam Lo

¹ Gagek sënë og yönon: Bë mehöti gevongin nabë natu ggev begegin Kerisi-yi-alam, og sënëḱ gevong in huk nivesa ti. ² Nebë sënë, om ggev gegin yi

nivesa in ngaa nipaya su gëp vu yi. Yik geko avëh timu natu venë. Su gevong ngaa jeggin jeggin, gak yik sepa dok kwa nivesa mu megevong huk niröp pin, gegegin alam vatëvek nivesa, getatekin Anutu yi gagek nivesa megero. ³ Ggev nebë sënë og su nanum pangsen mekeyevin, log su ahë sengen jak pevis, gak nahubin alam gesu gevong begö jeggin jeggin, gesu gëp natumin monë pangsen. ⁴ Geyö gegin venë lo nalu lo nivesa begevong benalu lo nengaj yes vu aye medegurek babu. ⁵ In mehö sën su negin venë lo nalu lo nivesa rë lo, og su yoh vu bë rëk natu Anutu-yi-alam lo hir ggev megegin sir nivesa rë. ⁶ Log ham su gwevong bemehö mewis ti sën nahën neggerin yi yom vu Kerisi lo natu ggev. In rëk geko yi jak jak lob rëk bës benatök vu nyëvewen nabë Satan. ⁷ Om nabë hil getung mehöti natu ggev, og alam dahis la denaner geving rë nabë yi mehö nivesa, og mëm yoh vu bë natu ggev. Gak nabë hil su gango rë, og mak rëk gagek nipaya natök rangah jak yi, lob dok Satan yi gegweeng.

Gagek Rak Kerisi-yi-alam Hir Hur

⁸ Log gwetung alam sën kwaj nivesa lo denatu Kerisi-yi-alam hir hur geving nabë saga. Alam sën su denevong kwaj luu rë lo, galam sën su denenum wain rot medenekeyevin rë lo, galam sën su ggëp denetumin monë luu ngaa rë lo. ⁹ Gak mëm sir sën ayoj yö neggëp niröp gedenerak gagek-anon-vongvingsën-yi ni venuh lo og mëm. ¹⁰ Ham seggi sir namugin rë, loq nabë gagek ti su neggëp vu sir rë, og mëm denatu Kerisi-yi-alam hir hur. ¹¹ Log ham gwetung avëh sën kwaj nivesa lo geving nabë saga. Avëh sën su denenër gagek nipaya yah nenga

raḱ mehö ngwë rë lo, gesu denevong ngaa jeggin jeggin rë lo, gaḱ denenër gägek niröp bedenevong yoh vu lo.

¹² Lob Kerisi-yi-alam hir hur lo, og degeḱo avëh ti ti natu venëj, lob degegin venëj los naluj nivesa.

¹³ Lob sir sën detu Kerisi-yi-alam hir hur bedenevong huk nivesa lo, og rëḱ bengöj nivesa, lob deyoh vu bë rëḱ degevong Kerisi Yesu yi huk nivesa los niwëëk.

Anutu Yi Aggata Degwa

¹⁴ Yönon, gwëbeng sa neḱevu ḱapiya sënë yök vu hong, rëḱ mu sa bë nöḱ vu hong pevis. ¹⁵ Rëḱ mu nabë sa su nöḱ pevis rë, og gwelë gägek sënë megejaḱ ni nabë Anutu-yi-alam sën detu Mehöböḱ Mala-tumsën-degwa yi alam lo, og rëḱ degevong nabë sënë in denegin gägek anon medenegadu.

¹⁶ Yönon, gägek sën duu hil yah vetii Anutu lo, og gägek böpata rot bedegwa neggëp. Gägek sënë nebë:

Tu mehönon raḱ betök yam rangah,

log Anon Vabuung tateḱin yi degwa bë yi mehö yohvu.

Angër delë yi,

log bengö yoh vu alam dahis.

Mehönon ayoj neya timu vu yi,

lob Anutu ḱo yi raḱ yah vavunë beḱo arë raḱ.

4

Gägek Raḱ Alam Tetuhinsën

¹ Anon Vabuung nër rangah bë dus jaḱ Buk-tamusën og alam vahi rëḱ degevu gägek sën hil nehevong ving lo na, getum rëḱ degebë nengaj

vu memö kuungsën ayej bedesepa dok Satan yi angër nipaya lo hir gägek. ² Ngaa sënë rëk nam vu alam kwaj luu sën denenër gägek kuungsën lo. Alam sënë rëk ayoj bev rasap nabë aën niķerus, besu deyoh vu bë deseggi ngaa nipaya los niröp medejak ni rë. ³ Log alam saga rëk denanërin nabë maluh los avëh su degeķo sir, gaķ demedo bu, log rëk denanërin nos los reggu vahi nabë hil su aga. Rëk mu su yoh vu rë, gaķ Anutu yö tung ngaa pin sënë in bë hil mehönnon sën hil ayod neya timu vu yi menarak yi gägek anon ni lo, hil aga gahëd nivesa vu Anutu. ⁴ In ngaa pin sën Anutu tung lo og nivesa, om hil su ajuuk, gaķ hil nanër ahëd nivesa vu Anutu gehil aga. ⁵ Eë, yönnon, Anutu yi gägek los hil jomraķsën saga nevonġ benivesa nerak.

Timoti Tu Kerisi Yi Hur Nivesa

⁶ Log nabë genanër gägek pin saga vu hil arid lo sën Kerisi-yi-alam lo, og mëm saga rëk tato nabë getu Yesu Kerisi yi hur nivesa ti gegenesepa loķ gägek niröp megenerak gägek sën hil nehevong ving lo degwa ni. ⁷ Rëk mu nim dëlin ķeriing nipaya los avëh atov hir gägek turinsën meris meris, gaķ mëm getahu hong dok Anutu yi aggata nivesa. ⁸ Yönnon, hil netahu hil loķ ngaa navid yi in bë hil navid gengoin, rëk mu yiķ nelok vu hil paya teka mu. Gaķ mu nabë hil tahu hil dok Anutu yi aggata, og yoh vu bë rëk dok vu hil pangsën rot. Sagi og yoh vu bë dok vu hil vu buk sën hil nado gwëbeng agi, gehil rëk medo malad-tumsën vu tamusën geving.

⁹ Gägek sënëķ yönnon rot, beyoh vu bë alam pin degengo medegevonġ geving. ¹⁰ Om sën

hil nehevong huk böp los nid kerus kerus. Hil ahurek Anutu sën mala-tumsën degwa lo babu in nevongin bë geḱo alam pin nom vu yi, lob ḱo hil sën hil ayod neya timu vu yi lo yom yönon. ¹¹ Om genanër gägek sënë vu sir megetahu sir doḱ in de-sepa doḱ. ¹² Nabë alam degelë hong nabë genahën magëm, bekwaj bo nabë hong mehö meris, og su gwevuu huk rë. Gaḱ gemedo megetato aggata vu Kerisi-yi-alam pin jaḱ ngaa pin sën genanër los gwevong lo. Getato vu sir nabë ahëm neving sir yönon gayom neya timu vu Yesu, gegenesepa loḱ ngaa niröp mu. ¹³ Su nim tebö, gaḱ nim wëëk megenatevin Anutu yi gägek vu alam, begenanër Bengö Nivesa rangah megetatekin vu sir rot bena berup doḱ buk sën senök berup vu hong lo. ¹⁴ Su nim yes yes in Anutu yi semusën sën vo vu hong lo, in alam ggev debë nemaj rak hong wirek. Log alam-denenër-gägek-rangahsën denër bë semusën sënë rëḱ natök vu hong. ¹⁵ Om gwegin huk sagi nivesa noh vu buk begemedo doḱ rot, lob mëm alam pin rëḱ degelë nabë hong huk neya nivesa. ¹⁶ Gwegin hong los huk sën genevong agi bekwam bo gägek sën getahu sir doḱ lo nivesa. Gwevong huk sënë niwëëk rot, og mëm rëḱ gweḱo hong nom vu Anutu, begweḱo alam sën degengo hong gägek lo nom geving.

5

Timoti Geli Alam Doḱ Aggata Niröp

¹ Su gebo gägek jaḱ alam böp, gaḱ gwelë sir nabë amam lo benahub gebo horek vu sir. Log gwelë alam magëm nabë arim lo sir. ² Log avëh böp og

gwelë sir nabë atam lo, log gwelë avëh avö nabë avëhnöm lo gengaa nipaya nök gëp.

Gagek Raḵ Avëh Alov

³ Log gwegin avëh alov lo sën reggaj diik gehej alam ma lo nivesa. ⁴ Gak avëh alov sën nalu lo ma bu lo denedo lo, og mëm deḵ ni nivesa nabë hir huk neggëp bë dedok vu amaj los ataj gebuj medegegin sir nivesa dok nah sën denegin sir wirek lo. In Anutu kwa vesa in ngaa nebë sënë. ⁵ In avëh alov sën yö perurek timu nedo lo, og rëḵ ayo na timu vu Anutu rot, lob rëḵ bengev jaḵ meketag na vu Anutu in alam buk gerangah. ⁶ Rëḵ mu avëh alov sën yö kwa nevo ngaa sën nesemu navi mu lo, og nahën nedo vesa rëḵ mu tu ngaa diiḵsën. ⁷ Om genanër ngaa sënë tato vu avëh geving, in desepa dok medemedo niröp gegagek la su gëp vu sir. ⁸ Rëḵ mu nabë mehöti su gegin yö yi alam nivesa rë, og mehö sënë su ayo neya timu vu Yesu rë. Yönon, nabë mehöti su gegin sir sën lo sho beggang ayo timu lo nivesa rë, og yi mehö nipaya verök yi rot kesuu alam dahis.

⁹ Lob nabë kwevu avëh alov arëj nabë Kerisi-yi-alam degegin sir, og kwevu sir nabë sënë arëj: Avëh sën raḵ maluh timu rëḵ diik genedo alov, lob yi ta mehödahis löö ya ggovek lo. ¹⁰ Gavëh sën alam denenër bengö bë nevong ngaa pin nivesa lo, og kwevu avëh nabë sënë lo arëj. Gavëh sën negin nalu lo nivesa, genevet alam vatëveḵ, geneḵo Kerisi-yi-alam vahi raḵ genelok vu alam sën denetök vu maggin lo, genevong huk nivesa vesa aggagga lo. Kë, avëh nabë sënë og mëm kwevu arëj. ¹¹ Gaḵ su kwevu avëh sën nahën

navij mewis greggaj nediik lo arëj, in rëk ayoj gurek in maluh, bahëj geving nabë dejak maluh ngwë gökin, lob su kwaj bo Kerisi timu rë. ¹² Lob alam rëk denanër sir nabë nij paya, in dekeyëh gagek sën denër bë degevong huk vu Kerisi timu lo. ¹³ Rëk su rëk degevong nabë sënë mu rë. Gaq rëk nij tebö jak pevis medegëp sehëb, gedegetup dok alam hir beggang medenengo mehö ngwë hir gagek medejak nij in mena detanë medenanër gagek aggagga sën hil su ayoh vu bë nanër rë lo. ¹⁴ Nebë sënë om sa bë avëh alov sën nahën navij mewis lo, og dejak reggaj nah in degeko naluj meyö degegin dok hir beggang. Yik degevong nabë sënë in Mehö sën nesis begö vu hil lo su natök vu gagek nipaya ti menanër jak hil. ¹⁵ In gerak ni bë avëh la devuu aggata nivesa ya ggovek ya nebë sënë gedenesepa lok Satan. ¹⁶ Nabë Anutu yi hur avëh ti yi alam la reggaj denadiik gedemedo alov, og avëh saga yö gëgin sir. Yö gevong nabë sënë in su debo maggin vu Kerisi-yi-alam vahi medegegin sir. Nabë sënë in Kerisi-yi-alam mëm yik degegin avëh alov sën hir alam main sir lo mu.

Gagek Rak Alam Ggev

¹⁷ Alam ggev sën denevong huk nivesa rot lo, og ham sën Kerisi-yi-alam ham lo gwëko arëj jak geham dok vu sir nivesa rot. Sënëk sa nanër alam ggev sën denevong huk niwëëk medenenër Anutu yi gagek rangah medenetatekin nivesa vu alam lo. ¹⁸ Nabë saga in gagek neggëp lok Anutu-yi-kapiya nebë, “Su getaya burmakau sën denevong huk bedenevakë wit* lo avij,” gaq gëp in yik dega

teka! In gagek ngwë neggëp ving bë, “Mehö sën nevong huk lo, og yoh vu bë geḱo nyëvewen jaḱ.”

¹⁹ Log nabë mehö ti nanër ggev ti nabë nevong paya, og su gwebë nengam vu aye, gaḱ mëm nabë mehö luu ma mehö löö denanër og mëm.

²⁰ Gaḱ mëm nabë ggev ti gevong ngaa nipaya ti, og gebarah yi verök jaḱ alam ggev pin malaj, in sir vahi degelë lob degöneng in sir. ²¹ Sa nanër vu hong niwëëḱ jaḱ Anutu geKerisi Yesu losho angër sën Anutu ggooin sir raḱ lo malaj nabë: Gesepa doḱ gagek sën sa kevu agi niröp, besu kwam bo mehöti doḱ ayom namugin nabë vong paya, ma su vong paya rë, gaḱ gwengö gagek nivesa megeseggi loḱ mëm. Log su genanër gagek ahë sekë vu alam vahi gegenanër gagek ahë yes vu hong alam.

²² Log su gweḱo mehö ti megwevong natu ggev pevis rë, in yi ngaa nipaya rëḱ nom peḱa jaḱ hong geving, om ngo gwegin hong nivesa in gemedo nivesa gengaa nipaya su gëp vu hong.

²³ Log su genanum bël kul meris mu rë, gaḱ genanum wain teka geving, in gevong bahëm medo nivesa, geniraksën sën netök vu hong buk ngahi lo nivesa jaḱ teka.

²⁴ Log alam vahi, og hir ngaa nipaya neggëp rangah behil pin arak ni bë rëḱ denatök vu nyëvewen doḱ nah, rëḱ mu alam vahi, og hir ngaa nipaya yö neggëp vunsën, benahub rë loḱ mëm netök yam rangah. ²⁵ Yik ngaa nivesa vahi neggëp rangah nebë saga ving, gaḱ nabë neggëp vunsën og yö rëḱ netök yam rangah tamusën in su yoh vu bë gëp vunsën degwata rë.

6

Gagek Raḵ Hur Sën Detu Ngaa Meris

¹ Alam pin sën mehö la denebago sir medenetu hir ngaa meris lo, nabë Kerisi-yi-alam sir og degurek alaj lo babuj in gagek nipaya su jikin Anutu arë los yi gagek sën hil nanër lo.

² Log hur sën alaj detu Kerisi-yi-alam lo, og su kwaj bo nabë arij om degevonḡ huk paya paya gesu degöneng in sir rë. Gaḵ ahëj geving alaj sënë rot in Kerisi-yi-alam sir, gepasang degevonḡ huk nivesa rot vu sir. Om getateḵin vu alam nabë degevonḡ ngaa nabë sënë, log genanër be-degevonḡ.

Hil Su Ahëd Geving Monë Pangsën

³ Hil Mehöböḡ Yesu Kerisi yi gagek netateḵin Anutu yi ngaa rangah menero vu hil niröp. Om nabë mehöti gebë gagek sënë geto getahu mehönon doḵ gagek agga ngwë, ⁴ og hil ajaḵ ni nabë mehö sënë neḵo yi raḵ meris mu. Su kwa teka neggëḡ rë, gaḵ kwa nipaya neggëḡ vu yi. In ahë neving bë luho mehö ngwë degök sir in gagek la bedekesuu sir. Log ahë neving bë demehoo sir in gagek degwa. Ngaa nebë sënë og nevonḡ balam ayoj nesis yi, gedenevonḡ begö, gedenenër pelësën raḵ sir, gekwaj nevo ngaa nipaya raḵ alam vahi. ⁵ Log denenër sir in gagek bahëj sengën yoh vu buk in kwaj nipaya, gaḵ gagek anon su neggëḡ vu sir rë, in denekuung bë hil nesepa loḵ Anutu in hil agorek kupeḵ lu ngaa.

⁶ Yönon, nabë mehöti sepa doḵ Anutu niröp begelë ngaa sën neggëḡ vu yi lo nabë yik yoh vu yi, og nelë saga bë neḵo ngaa ngahiseḵë rot. ⁷ In hil

atad ko hil los nemad meris vu dob, log buk sën hil gevuu dob lo, og hil rëk anah nemad meris nabë saga. ⁸ Om nabë hil nos los tob neggëp vu hil, og yik ggovek behil medo revuh los kwad vesa. ⁹ Rëk alam sën kwaj nevo bë degeko kupek ngahisekë rot lo, og seggisën rëk natök vu sir, lob rëk debës nabë sën mehönon deneko reggu luk söv. Ayoj nekehe sir in kupek lu ngaa, lob denesepa lok ngaa kwamasën los ngaa nipaya agga ngahisekë, om rëk kebu jak sir bedenadiik bemalaj nama. ¹⁰ In ngaa nipaya aggagga degwa neggëp vu sën alam ahëj neving monë lo. Yönon, alam vahi ahëj neving monë pangsën rot, lob nedadii sir gedenevuu vongvingsën ya, log denevasap sir rak sënë medenetök vu maggin böpata rot.

Genapiik Vu Sën Gemedo Malam-Tumsën Degwata Lo Niwëek

¹¹ Rëk mu hong sën Anutu-yi-alam hong lo, og gweruu demim vu ngaa nabë sënë gegebeya in. Gaq yik nim wëek megesepa dok ngaa niröp los Anutu yi aggata sogek. Ayom na timu vu yi, log ahëm geving alam pangsën. Genajom hong ahon megebare niwëek gemalam yes. ¹² Ayom neya timu vu Kerisi, om getahu dok alam sën deneserög in bë degeko kupek-yagek-yi lo bebasang geserög niwëek in gemedo malam-tumsën degwata los degwata. In Anutu ggooin hong rak wirek lok buk sën genër rangah rak alam ngahisekë malaj bë rëk gesepa dok gagek anon lo. ¹³ Sa nanër vu hong jak Anutu sën nevo saheng vu ngaa malaj-tumsën pin lo, luho Kerisi Yesu sën nër yi gagek anon rangah rak Pontius Pilatus mala gesu ggöneng in

rë lo malaj nabë: ¹⁴ Gwegin gagek pin sënë nivesa. Su genanër la paya, gesu gwevong bemehö ngwë denanër gagek nipaya jak. Gaḵ ngo gwegin nivesa begëp niröp, rot behil Mehöböp Yesu Kerisi duk nom. ¹⁵ Yönon, Anutu ggooin yi buk raḵ ggovek ya bë rëḵ tato Kerisi rangah, lob yiḵ Anutu timu sënë sën semusën degwa geyi ala menegin ngaa pin los dahis. Alam-los-bengöj pin hir mehö-los-bengö yi, gemehö böp pin hir Mehöböp. ¹⁶ Yiḵ yi timu sënë sën su nediik rë. Yö nedo loḵ rangah soḡek, om hil su ayoh vu bë ana dus jak yi rë. Mehöti su lë yi rë, gemehöti su yoh vu bë rëḵ gelë yi rë. Arë böpata rot geniweëk rot berëḵ medo degwata los degwata nabë saga. Yönon.

Gagek Raḵ Alam Sën Deneggorek Ngaa Ngahisekë Lo

¹⁷ Genanër vu alam sën deneggorek ngaa-dob-yi ngahisekë lo nabë su degeḵo sir jak vu alam vahi, gesu kwaj na vu hir ngaa sënë nabë doḵ vu sir, in rëḵ mala nama na pevis. Gaḵ mëm ayoj na timu rot vu Anutu, in yi saga yö nevong yi ngaa nivesa vesa ngahisekë vu hil in bë hil medo los kwad vesa. ¹⁸ Genanër vu alam sën deneggorek ngaa aga nabë degevong huk nivesa vesa ngahisekë, log degevong ngatum bedebo hir ngaa gelek alam bededoḵ vu sir medegero. ¹⁹ Nabë degevong nabë saga, og rëḵ dengupin ngaa ngahisekë in doḵ vu sir vu tamusën, lob deyoh vu bë rëḵ denatöḵ vu mala-tumsën soḡek.

Gwegin Hong Huk Nivesa

²⁰ O Timoti, gwegin huk sën Anutu vo loḵ yöḵ nemam aga nivesa. Gweruu demim vu gagek

meris meris pin sën anon ma lo, los gagek jeggin jeggin sën su neya niröp vu Anutu yi gagek rë lo. Log gweruu demim vu gagek sën denenër medenekuung rak bë kwa böpata neggëp loḵ, rëḵ ma genesis begö vu Anutu yi gagek lo.²¹ Alam vahi ahëj neving gagek nebë saga bedeneḵo rak, lob deneyoh paya in gagek anon. Anutu yi semusemu medo geving ham.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 21 Feb 2024 from source files dated 31 Aug 2023

18a972db-abcc-5dc3-9031-f1d4455b33c3